

Pelajar sekolah, penuntut IPT diberi baucar buku RM100

Mekanisme tuntutan akan diumumkan jam 2 petang ini

Oleh Zanariah Abd Mutalib dan Latifah Arifin
bhnews@bh.com.my

Kuala Lumpur: Datuk Seri Anwar Ibrahim semalam mengumumkan pemberian baucar buku bernilai RM100 bagi pelajar Tahap Dua sekolah rendah, sekolah menengah hingga peringkat institusi pengajian tinggi (IPT).

Perdana Menteri berkata, baucar berkenaan boleh dituntut melalui mekanisme yang akan diumumkan, mulai jam 2 petang ini.

“Untuk anak, baik di sekolah kebangsaan, sekolah Arab, sekolah jenis kebangsaan Cina atau Tamil dan universiti, kita berikan baucar RM100.

“Bagi tahun ini, kita mulakan dari Tahun Empat, untuk mengurangkan tekanan kewangan kerajaan.

“Ia turut diberikan kepada pelajar sekolah menengah, universiti, kolej, institusi perguruan dan sebagainya.

“Mulai jam 2 petang esok (hari ini), pemberian baucar ini akan dimulakan, insya-Allah,” katanya ketika berucap merasmikan

Pesta Buku Antarabangsa Kuala Lumpur (PBAKL) 2024 di Pusat Dagangan Dunia Kuala Lumpur (WTCKL), di sini, semalam.

Yang turut hadir ialah Menteri Pendidikan, Fadhlina Sidek; Menteri Pendidikan Tinggi, Datuk Seri Dr Zambry Abdul Kadir; Timbalan Menteri Pendidikan, Wong Kah Woh; dan Menteri Besar Selangor, Datuk Seri Amirudin Shari.

Selain itu, Menteri Sains, Teknologi dan Inovasi Sabah, Datuk Dr Mohd Arifin Mohd Arif, serta Pengerusi Pengelola PBAKL 2024, Mohd Khair Ngadiron, juga hadir.

Anwar turut mengarahkan Kementerian Pendidikan Tinggi (KPT) menyediakan format bagi tuntutan baucar berkenaan supaya ia dapat dimanfaatkan pengunjung PBAKL 2024, memandangkan acara perbukuan itu bakal berakhir tiga hari lagi.

“Menteri Pendidikan Tinggi perlu sediakan format untuk menggunakan baucar berkenaan. Saya harap ia dapat digunakan mulai esok (hari ini) di PBAKL supaya pengunjung di sini dapat memmanfaatkannya untuk membeli buku di sini.

“Saya juga anjurkan supaya (di buat) senarai judul tertentu supaya sebahagian daripada peruntukan baucar itu digunakan untuk membeli buku diusulkan dan sebahagian lagi diberi kelonggaran untuk anak memilih sendiri. Kenapa saya sebut begitu, kerana mengikut amalan lalu, buku dipilih (anak-anak) adalah buku pi-

cisan yang tak bernilai.

“Selalu saya sebut untuk memupuk minat belajar dan mencintai ilmu. Sebagaimana diungkapkan Saidina Ali bin Abi Talib, ilmu itu lazat, memberi minat dan memperkayakan minda, seterusnya memberi kita kewarasan kebijaksanaan dan hikmah,” katanya.

Tegasnya, masyarakat perlu diberi pemahaman mengenai makna ilmu yang sebenar supaya tidak terdedah dengan maklumat atau karya yang tidak bermanfaat.

“Bukan semua maklumat itu ilmu. Ada juga maklumat yang hanya sekadar maklumat, selain ada juga yang masuk kategori ilmu. Ilmu seperti dikupas ulama dan sarjana, ada yang memberi manfaat dan tidak memberi manfaat.

“Justeru, kita perlu latih anak membaca, cintai ilmu dan tentukan yang mana adalah informasi, ilmu dan seterusnya mempunyai keupayaan menyaring apa yang disebut ilmu makrifah atau kebijaksanaan,” katanya.

Budayakan amalan membaca

Menyentuh kebimbangan awam terhadap kurangnya minat membaca, khususnya dalam kalangan generasi muda, Anwar berkata, penting untuk semua pihak termasuk kerajaan lebih berani membuat anjakan ke arah membudayakan amalan itu.

Beliau turut melihat sambutan hangat pengunjung pada PBAKL kali ini yang mencecah lebih sejuta pengunjung dalam masa tu-



Anwar bersama orang ramai yang hadir pada Majlis Perasmian PBAKL 2024 di WTC Kuala Lumpur, semalam. (Foto Aswadi Alias/BH)

juh hari penganjurannya sebagai satu petanda baik mengenai minat masyarakat terhadap buku.

“Minat membaca itu menurun, diganti media sosial yang kononnya memberi laporan dalam satu dua minit, ya, ini membimbangkan. Dalam negara MADANI, kita mesti mengangkat semula (budaya membaca) dan berani buat sedikit anjakan. Saya berterima kasih kepada pihak penganjur (PBAKL) kerana tahun ini, bukan sahaja pengunjung ramai tetapi dalam empat hari pertama, pembelian buku bertambah.

“Yang sudah datang (PBAKL), beli buku, balik nanti kenalah baca. Saya juga mengharapkan supaya buku tulisan Sasterawan Negara kita tidak ditinggalkan. Ada (banyak) novel tulisan Sasterawan Negara terkemuka yang diterbitkan antaranya karya Datuk Seri A Samad Said, Allahyarham Prof Emeritus Datuk Dr Shanon Ahmad dan Datuk Dr Anwar Ridhwan. Senarai (karya) Sasterawan Negara ini yang patut diusulkan (untuk dibaca),” katanya.

Selain itu, Perdana Menteri turut meluangkan masa melawat reruai buku yang mengambil bahagian pada PBAKL tahun ini, termasuk reruai Negeri Tamu, Sabah yang bertempat di Aras Dua, WTC.

Anwar turut menyempurnakan pelancaran Buku Edisi Malar Segar Sasterawan Negara, terbitan Dewan Bahasa dan Pustaka (DBP) di Dewan Tun Hussein Onn, WTC, semalam.

Antara Sasterawan Negara yang hadir dan diraikan pada acara itu adalah Datuk Seri A Samad Said, Datuk Dr Anwar Ridhwan, Datuk Baharuddin Zainal atau Baha Zain, Datuk Dr Zurinah Hassan dan Datuk Rahman Shaari.

Sebanyak 15 naskhah yang terkandung dalaam siri khas Sasterawan Negara itu antaranya *Sajak Sejarah Melayu* karya Prof Emeritus Dr Muhammad Salleh, *Sungai Mengalir Lesu* tulisan Datuk Seri A Samad Said, *Naratif Ogoshonto* (Anwar Ridhwan) dan *Tiga Catatan Perjalanan* (Baha Zain).